



Aqqalu C.Jerimiassen
Atassut

UKA 2024/28
03. oktober 2024

Uunga siunnersuut: Takornariartitsinermit, sumiiffinni nunami aalajangersimasuni zone-nut agguaasarneq il.il. inuussutissarsiutigalugu ingerlatsinermi aammalu killeqartumik sumiiffiit ilaanni angalaarsinnaaneq pillugit Inatsisartut inatsisaat

(Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Island persussanngilarput, uagut kukkusimanitsinnit ilikkajuikkaluaqaluta nassuerumanngittaraluaqalutalu, uani tamanna pissanngilluinnartoq ataatsimooruttariaqarparput. Takornariaqarnikkummi aningaasarsiornerep nunatsinni annerpaamik iluanaaruteqarfuiussaa iluaqutaanissaalu pisariaqarpoq, inortuivallaartigata inatsiseqalertariaqarpugut.

Immaqa eqqumiiginalaarsinnaangaluarpoq, aallartinnerani inatsiseqalernissamut Atassummi apeqquseeqqapajaarsimangaluaratta, maannali misigisimavugut pissutissaqarlualuta inatsiseqarnissamut tapersiinnissamut.

Ukiorpanngortuni misilittagaqarnerluffigisimaqaarput nunaqqatigiisugut, takornariaqarnerup iluani ineriartornermi annertuallaamik pisortat pigisaat, taamatuttaarlu nunatta avataaniit pigineqartut unammillernerujussui nunaqqatitsinnut namminersortunut.

Pisagangisinnaasarput ataaseq tassaaginnalerpoq, namminersortunummitaavami nunaqqatitsinnit ingerlanneqartunut qanoq una inatsit sunnuteqassava, tassami pisortat suliffeqarfii tassaammata unammillertuusut annerpaartaatut taaneqarsinnaasut sumiiffinni unammillerfiullalereersimasuni, assersuutingalugu Ilulissani.

Atassuummiit takornariaqarneq pillugu siunnersuutigisarsimasatsinnut, taamatuttaarlu oqallisissiatigut ingerlattarsimasatsigut malunnarpoq naalakkersuisuttaaq inatsisiliorniarnermi annertuumik tunaartassaqalersimasut ilusilersuinissaminnuttaaq, nalorninartippallaarunnaarlugu qinikkat akornganni takornariaqarneq pillugu qanoq ingerlaqqittoqassanersoq.

Pingaarnepaatinniartuartaarsimavarpummi Atassummiit, nunatsinni inuiaqatigut namminersortutut inuussutissarsiortut sorliungaluarpalluunniit inuussutissarsiut, pitsaanerpaamik oqinnerpaamillu atungassaqartinneqartariaqarnerat.

Maannakkumullu uani inatsisissatut siunnersuummi maluginiarneqarsinnaavoq, tusarniaasimanerni amerlanerpaanit tapersernartinneqartoq, tapersiisullu tasaanerpaasut nunaqqatigut namminersortutut ingerlatsisut. Taakkuusariaqarpullu annerpaamik tusaaniagassagut



tusarniaanermi akissutaat, pisortat pigisaasa isorinnillutik oqariartuuteqarsimaneri assigiinnarpaa qarsupiinnaraanni.

Zone-nik aqqissuussisarnermi sapinngisamik aporaaffinngortoqaratarsinnaanissaa ingalassimatikkumallugu, sumiiffimmi asiartarnerit allallu aalisariarfiusartut tamaasa kommunit suleqatigeqqinnaarlugit inississorneqartariaqarput, tassanilu naalakkersuisoqarfik tassaassanngilaq kisimi aaliangersaasartuusussaq, koncessioninut tunngatillugu kukkussussuaq uterteqqinneqassanngilaq, kiisamitoruna kukkussutaasimasunik tassani ilikkagaqalaarisa manngertitaannaqinata.

Qilanaaraarput Atassummiit aappassaaneerreqartigani Inuussutissarsiornermut Aatsitassanullu ataatsimiitsitaliap qanoq anoq allannguutaasinnaasunik, maannalu oqaaseqaatigineqartunik anngussaqarumaarnera. Piareersimavugut Atassummiit nunatsinni takornariaqarnerup pitsaanerpaanik sinaakkuteqalersinneqarsinnaanissaanut ilusilersueqataassalluta.

Unalu suliaq annertungaatsiarmat, tamaat peqqissaarullugu suliarineqartariaqartutut isigaarput, taamaalillutalu ataatsimiitsitaliaq sulilluarnissaanik kissaatiinnarlugu oqaaseqaateqarluta taamatut.